

摘藻堂四庫全書薈要

集部

欽定四庫全書薈要卷一萬六千七百二十一

集部

懷麓堂集卷九十二

明 李東陽 撰

文續稿二

南行稿

高祖戊戌七府君墓表

成化壬辰之春魯孫封翰林院編脩淳將歸謁曾祖考處士之墓于茶陵玄孫東陽寔自翰林請于上以從魯

孫淳乃具述曾祖本末授于玄孫東陽使撰次其辭刻石京師載而歸表之墓道以示于凡為宗族鄰里鄉黨者其辭曰嗚呼惟我李氏出自臨洮譜傳為西平忠武王之後王之第十子曰憲為觀察使始居江西江西之八世諱餘始遷于茶陵之中洲茶陵之九世為我曾祖考處士諱某行戊七時有諱祁元元統初進士及第鄉人稱為狀元者蓋族兄弟也狀元既避地永新其子位及族兄弟若一源若高清若尚賓若我曾祖考皆畱茶

陵茶陵之族益廣國朝洪武初我祖考處士始以戍遷  
于京師寔生我祖考處士諱允興以及于淳于澤澤今  
為金吾左衛所鎮撫淳生不及祖考祖妣賀之存尚能  
道曾祖時事曰吾舅為人敦樸謹厚德淳于言其行吾  
則不能詳然人皆曰是長者也其世吾則不能詳然人  
皆曰是李狀元之族也其墳墓吾能知之地曰荷木坪  
泉曰光泉水曰芝水去中洲五里而近先考之將沒也  
召淳等而命之曰吾父母塋京師吾力不能歸吾死其

從之然汝輩慎無忘茶陵淳等泣而謹識之淳伏念生  
賴先世積累有以至今日惟我曾祖考養不逮祭不造  
亦惟我同姓父兄保護之勤二三耆舊左右望助之力  
是賴于數十年靈有攸宅亦有攸待維桑及梓夙夜之  
所不能忘也嗚呼享其澤而不知其所自出者非人也  
知其所自出而不感且動焉非人之情也無踐我封無  
剪我樹無圯我基址以成我志于不替者是深有望于  
我後之人于我宗族于凡我鄰里鄉黨也謹拜手稽首

而表之曰此我曾祖考處士李公之墓

祭高祖處士府君墓文

維年月日孝曾孫封翰林編脩文林郎淳率孝玄孫翰林院編脩文林郎東陽謹用剛鬣柔毛庶羞之奠昭告于顯曾祖考戊七處士府君之墓曰不肖淳等生長京師于茲三世以祖以孫壯者老稚者壯聲音既哀俗尚寢殊蓋自先考之存痛念先世墳墓所在未嘗不延頸凝睇涕下沾襟也道里既遠又屬戎役省丘之念至今

悲之淳等雖不肖夙夜驚惕不敢忘先世之訓曰無忘  
茶陵無忘荷木坪淳生五十有七年家始多蠱中遭大  
故及東陽稍長遂竊有官秩不敢違離然每得一俸必  
相與語曰此曾祖考之報也誦一編曰此曾祖考之所遺  
也見鄉鄰親舊必曰此曾祖考之所與通家者也如是  
者亦數年乃以今年命東陽上疏以展墓請皇上憫其  
愚誠賜之楮鏹舟楫有費祭祀有物使得匍匐墓下傾  
烏鳥之私淳伏念曾祖考積累之恩聖天子寵賚鼓勵

臣下之德皆足示來世乃命東陽撰次先世本末刻石  
京師以來用是日吉旦大會宗族孫子樹之墓道使凡  
來世有所瞻式嗚呼丘隴不移山川在目瞻望感慕不  
知所云

祭族高祖提舉府君文

彼元氏之既衰兮世混亂而不綱惟賢哲之相遭兮亦  
懷貞以自藏繫予祖之既歿兮爰引祿而南遊曾歲月  
之幾何兮曰歸茶陵之故丘結茅菅以為廬兮彼軒冕



其猶敝屣思柴桑于長江兮值山河之遽改世可晦而  
為明兮物緇不可使為朱豈不知堯舜之難逢兮寧巢  
許之為徒丘固各有首兮時固有所值也寧死于永新  
之土兮曰惟吾心之無愧也彼宏辭與麗藻兮固予祖  
之所遺蓋嘗靜言以思之兮又何啻乎今世之所希慨  
愚生之既晚兮奄忽周乎四世喜宗譜其猶未泯兮懼  
芳風之莫嗣承予告以展省兮掃松楸于荷木之野持  
一奠而酬茲兮固予心之望者念祖德之莫揚兮在孫

子為弗仁彼金石之無文兮愧汗下而沾襟返故廬以  
為家兮不肖者之志也蹇淹留而無成兮敬陳詞以為  
戒也意惘惘而莫宣兮魂髣髴而上征庶九泉之可通  
兮託哀辭于楚聲

宋知潭州李忠烈公祠記

成化五年春正月長沙府知府臣錢澍言臣所守宋潭  
州地按宋知潭州李芾當元兵之熾始至潭州畫地而  
守日以忠義勵壯士人皆殊死戰有誘降者輒斬以徇

城且陷芾召帳下沈忠遺之金曰吾力竭當死吾家人不可辱于俘汝盡殺之而後殺吾忠辭不獲命乃醉其家人徧刃之芾亦引頸受刃忠焚芾居還殺其妻子復至火所自殺是時先芾死者知衡州尹穀寓居城中冠其二子與其家人死于火叅議楊震死于池後芾死者幕僚陳億孫顏應琰潭民多舉家自盡城無虛井縊于林者相望其事昭晰在史傳布揚在天下浹洽在郡人耳目而郡之祀事不立其為闕典甚不細臣已立祠于

帝所居故地以尹穀等配請諸祀典儀物使有司永有  
所遵式事下禮部具春秋祭帝用豕一羊一粢盛備餘  
各羊一制可越三年壬辰東陽展墓歸至長沙拜公于  
其祠錢侯以予為潭人且籍屬太史氏謂宜為記予惟  
自古有國家者莫不亡而萎弱困頓可悲痛者宜莫如  
宋宋之亡也仗節死義者數十人或止一身或連一家  
或暨其將佐而能使人感教之深且速如李忠烈者亦  
寡矣宋之後數十年其遺民故老尚隱思之忠烈死潭

人至今道其事猶慷慨泣下嗚呼是孰強之然哉忠義之在天下蓋有不待生而存不隨死而亡者苟順且誠無弗從之矣論者固以為宋三百年之報然當時棄城賣國背位而逃者亦豈少哉微忠烈潭之人未必能死死未必能多忠烈守潭未半年而能感潭人若是及其死舉湖以南皆降天下之存亡所繫可知也荆楚之間淫祀累千百而忠烈無血食地此豈可以示天下後世也繼自今吾郡之人瞻望感厲為臣必忠為子必孝嗚

呼惟忠烈之風亦惟錢侯之功侯既祠公其歲祀必親  
予為之作楚歌以祀公以紓潭人之思歌曰荒江澹兮  
冥冥悲風起兮洞庭靈之來兮揚舲載風起兮駕雲程  
紛鐵騎兮如雲奮前驅兮我軍寧為宋鬼兮生不為奴  
彼雄而烈兮什伯其徒朝鶴唳兮水濱暮猿啼兮木下  
莽空城兮落日痛三戶兮南楚楚之水兮荆之山靈之  
去兮淹復還酌桂酒兮三酌汎予淚兮潺湲余懷兮何  
極公之亡兮誓天與日芬鞠蘭兮蕉荔靈饗祀兮終吉

漢長沙王太傅賈公祠記

古所謂大臣者必先大體後庶務皆足以刑天下及後世然其自負甚重不苟合于人人未必能識識之未必能用此治所以恒弗成也漢屈群策豪傑並起而從之高帝之初所不能致者商四翁魯兩生之外天下其無遺賢矣明法律時則有若蕭何曹參治兵旅時則有若韓信彭越周勃出入籌策時則有若陳平酈生此皆創業撥亂之所為用非所以經世建統也文帝時可當大

臣者惟賈太傅一人少而薦于朝且顯矣卒短于大臣  
困于長沙老于梁嗚呼以文帝為君而太傅不得為之  
相是故漢之禮樂微矣吾觀其論天下之所置則先仁  
義後刑法論天下之勢則先夏後夷先身後臂論吏治  
則先風俗論世所以長久之術則先太子論大臣則先  
廉恥此其言皆治亂之大體所在戰國而下無能言之  
者豈不可以為大臣乎哉使太傅竟作相得有所施設  
必能刮去秦習成漢之一制非蕭曹而下可擬也不用



而死文帝固未嘗仇之天下後世蓋自不能無憾而司馬遷作史記徒以弔湘之賦遂與屈原同傳則亦甚矣太傅在長沙未久長沙人至今習知之其故宅卒為汪倫所居有井存焉成化某年我長沙守錢侯募郡人以財贖其宅地為祀塑像其中請著祀典詔以仲春秋祭用羊一豕一粢盛脩復其民一家使共祀事翰林編脩李東陽省墓歸自京師寔拜祠下侯請記其事立石于祠太傅史書之詳矣予為之記使後來者知茲祠也建

自錢侯始

長沙府學尊經閣記

金壇錢公自給事中擢守吾長沙數年政修而人悅乃作尊經閣于府學明倫堂之後其制宏達壯麗廣概而䟽節牖檻相衝薨楹交輝巨嶽當其前長江瀉其旁登此閣而吾郡之形勝可坐而見也吾郡故藏書皆燬于火公置書數千卷其中國朝所頒定者為先六經次之子史百家又次之居茲閣而天下之圖籍可坐而致也

成化壬辰予歸自長沙寔與教授梁君恒及諸生登之  
相與竊嘆錢君之功越翼日梁君率其諸生詣予館請  
曰惟茲閣不可無述今建且二年而石未立此固有待  
敢以請予曰諾乃諭于衆曰觀治者必觀其所尚而治  
效從之秦任刑法國用亡漢習法律其政雜伯兩晉尚  
黃老卒頽以敗梁武氏好佛餓而死唐工詞賦而士寡  
實行宋雖富儒術而未能用其治亦不古若惟我朝敦  
德崇禮以經治天下于茲百年治化休著風俗醇美視

今較昔其效甚明豈惟有國家以至于郡縣皆然錢公  
之治魏乎其所尚已今年祠賈誼明年祠李芾又明年  
祠長沙諸賢修先師廟庭以及儒學茲閣之成蓋多于  
前功于是時政事閒暇教化隆美居師儒招俊髦或瞻  
以登或息以游講習之暇蓋必有感乎其中者矣是故  
南瞻廟堂之尊思先賢之遺訓若嚴師在前惴焉而不  
敢肆西望嶽麓之高慨考亭故址懷高山之仰悚焉若  
有所不及北拱宮闕懷江湖之幽思仰答聖天子作養

教育之盛意而東望府治則思我公之功無負以能有成功無愧于天下後世則茲閣也豈直遊樂為觀美而已請與吾鄉之善士共勗之衆皆曰諾退相與刻石于閣中茲閣也經始于某年月日成于某年月日越某年月日翰林編修郡人李某記

新寧縣石城記

新寧縣古夫夷縣地也蓋自宋紹興間平楊再興之亂始即金城村為新寧縣隸武岡軍元季兵燬國朝洪武

初始復為縣隸寶慶府正統乙巳峒人楊文伯復亂總  
戎李公某平之其地荒不治景泰辛未知縣唐榮奏徙  
治于舊縣東二里許築土為城城且壞成化庚寅右僉  
都御史吳公琛奉命南巡湖廣按察僉事郁公文博議  
以為修石城便吳公曰然吾志也遂下有司寶慶知府  
謝侯省狀其民寡貧不克事宜勿修便吳公曰然吾不  
以煩而民止取其人若干乃罰贓為費摘戍為役命都  
指揮劉侯斌董厥事某衛千戶陳綱邵陽縣主簿汪玉

分理之輦石伐木薙冗補罅墉而局之既固且完凡廣  
袤若干里崇若干丈經始于是冬某月越明年秋某月  
成維時論者以為興廢舉墮者臬司之職也愛節民力  
寧彼弗卹者牧守之事也兼採羣策左右而麾指之思  
令兼行情法並用各得其所者大臣之能也僉憲之議  
微都憲莫能用太守之志微都憲莫能容揆厥成功歸  
于吳公公之來巡暑不張蓋險不御輿夙出而夜息地  
不遺僻郡政不弛末節旒倪仰賴若戴父兄貪官黷流

聞者股栗夷獠服其威信流徙悅其撫徠士卒先其驅  
使故茲役也吏胥有治民社有守禦侮有脩而民無怨  
聲官無殄財功肇于無前患消于未萌使天下司風紀  
者咸脩厥號令以威四方何所不濟天下之郡縣咸有  
疆屏何所不守循茲成績歲視時葺由今日以迄千萬  
年何所不至吳公之名與城無窮宜有記刻之金石壬  
辰夏東陽省墓歸茶陵獲覩公之風裁謝侯者寔同舟  
因叙茲城本末甚悉侯既歸治遣使請于予予湖人也



輒先耄稚作為詩歌以頌公以示于後人其詩曰惟郡  
之墟中有夫夷地險且巖溪回峒旋稚卉為鄰以世以  
年築塊為城其高可乘居人弗寧圖初及終伊誰之功  
惟我吳公惟茲庶官惴後矜先烝民戴懼石城憑憑譙  
樓鼓聲城門夜扃山谿野徂不避走趨莫我敢覲彼偏  
一方遠人所望天子之疆聖朝熙熙安弗忘危惟古之  
規惟公南巡有惠在人茲城嶙嶙億萬為期何以恒之  
責在有司

# 賀興隆傳

賀興隆者長沙安化清塘鄉人也元至正壬辰天下大亂民奔走錯愕莫相為命興隆率陳源隆姚廷曙等聚鄉民子弟為兵駐鎮安寨鄉有警輒出禦之民始定庚子歲陳爰諒兵起授興隆叅軍越五年甲辰春二月興隆率其衆歸于我朝太祖高皇帝嘉之仍予之故官徐公達之取辰州及降沅州諸郡興隆實在軍中攻戰撫募厥功惟多是年冬與總制胡海洋克寶慶路獲元元

帥唐隆遂與衆城守尋授寶慶衛指揮同知又明年乙

巳夏四月邵陽賊周文貴等作亂中鄉興隆率兵駐中

鄉六月與賊遇興隆徑衝其前鋒援不至遂力戰以死

朝廷以璽書褒贈其略曰唐兵未出睢陽之勢始孤智

伯漸強晉陽之城已浸首雖可折心乃不移未膺大國

之封遽見長星之墜贈湖南等處行中書省叅知政事

仍命有司立祠歲以戰沒之日祀用特祠在寶慶府太

史氏曰古人有言疾風知勁草世亂識忠臣豈不信哉

吾觀古之伏節死義者未嘗太息焉當元之季海內  
鼎沸兵革並起士大夫享有民社佩符秉燾者棄位而  
逃視其民之轉徙陷溺若秦越人之相肥瘠其身且不  
自保于民則又何賴興隆以一布衣伸鋤為兵蒸麥為  
糧出入守望為鄉邦保鄣荆楚之南苗民出入于斯為  
甚一方之不亡皆其功也天下未定垂翅而附翼不以  
為恥及夫誕運有主翻然來歸名正事成于焉罔愧逮  
夫事窮勢極竟殞其身寧為順死不為逆生嗚呼豈不

真知順逆大丈夫哉在古祀典曰能捍大患則祀以死  
勤事則祀若興隆者不祀誰宜祀耶人不幸生當亂世  
死于鋒鏑之下與沙虫同腐者何限賀氏獨享有祀典  
崇名煥勅昭耀來世彼俯首縮臂臣妾二姓冒旦夕之  
榮者萬死奚足贖哉予南遊湖湘頗搜采賢人義士聞  
寶慶人道賀公事甚著但其事未有傳傳錄于郡志本末  
殊不悉不載初授叅政為何省官又不載其子孫存亡莫  
可考見且其祠既久益荒落成化辛卯寶慶知府謝侯

始脩復之僉謂宜有述侯以為脩祀有司事不足記請  
為賀公傳立石于祠以示後人予既為傳且謂侯功誠  
不可泯又重違侯意因并附于傳末云

### 湘江送別詩序

物之境惟江山為勝而山之在江中者為尤勝然勝矣  
而人得以盡之者往往以為難君樊小孤諸山皆予所  
親歷樊山卑淺無叢林茂樹小孤雖秀拔恨當江之隘  
地勢不免為岸屈惟君山殊勝絕而又居洞庭浩渺之

衝風濤掀簸恒出于所不測雖有好事者多不得盡登  
臨之興予于諸山咸有遺憾焉獨金山屹在大江之中  
高不減數百尺遠不過數里殆造物者所以遺乎人而  
予猶未能振衣拂袂于茲山之側是又一恨也自古騷  
人墨客時出奇句與山爭勝求其卓絕者如求此山樹  
影中流見鐘聲兩岸聞差足快意耳天多剩得月地少  
不生塵非無足觀而驚濤濺佛之句且不免徐凝之謂  
于談者之口而世之君子猶病其不似予直恐其大似


爾扶桑斷石弱水長流安得此老輩哉予之歸長沙也  
金山釋湛然適來訪長沙守錢公公門下士黃華輩以公  
故壯此僧之歸也各賦詩贈之題曰湘江送別公欲得  
予序予重公之誼且愛此僧之名因呼而問之曰吾將  
遊姑蘇過而居謫孫張之作以繼茲山之勝留雲吞海  
諸亭能坐我一榻否僧曰諾遂書其卷而歸之

僕往年僑居鎮江館于佑聖觀觀之西曰能仁寺  
湛然所住也因得見此作愛其高古有議論讀之



數過已而成誦至今凡九年矣偶與西涯道及聞  
稿已不存遂錄而歸之予方病目不能作書此乃  
口授喬生字代書者也辛丑夏六月廿九日東陵  
楊一清識

懷麓堂集卷九十二



總校官庶吉士臣張能照  
校對官助教臣金學詩  
謄錄監生臣趙興吾

欽定四庫全書薈要

集部

懷麓堂集卷九十五

三至

詳校官候補通政司經歷臣郭祚熾



欽定四庫全書薈要卷一萬六千七百二十二

集部

懷麓堂集卷九十三

明 李東陽 撰

續稿三  
北上錄

校文畢即事呈洗馬羅先生明仲

同下天墀捧玉音南畿多士正如林升沉敢謂皆由命  
俯仰終教不愧心望入劍樓秋氣遠力窮珠海夜濤深

明明天意君應識萬里晴空無片雲

揭曉後次韻答何穆之王德潤二侍御并京尹

魯公懋功

藝苑名書次第開懽聲動地逐人來  
烏臺御史能持法京兆賢侯本愛才  
已見王畿多秀士不須文體見新裁  
極知君命如山重親向虞廷拜往哉

鹿鳴宴有作

花覆紅顏酒半醺秋風來聽鹿鳴歌  
萬年宮闕興王地

一代文章貢士科淺薄敢將身作鑑聖朝真用禮為羅  
祇應前後青雲路同在清朝白玉坡

重謁孝陵有述

龍虎諸山會車書萬國同星躔環斗極王氣繞江東地  
湧神宮出橋分御水通丹爐晨隱霧石馬夜嘶風日月  
無私照乾坤仰聖功十年瞻望地雲樹鬱葱葱

南京六部都察院通政司大理寺翰林院國子  
監太常寺尚寶司鴻臚寺諸公會宴于禮部有

述呈翰林院諸寅老

北闕黃華載寵榮南都賓禮重公卿三年賢俊登庸日

一代臣僚燕饗情已荷吾宗為地主

時季公立之為禮部侍郎

兼勞

長者避門生

太常少卿劉公子座主是日避不至

詞林故事從來重薄劣

猶煩齒姓名

過太常楊公垣西草堂次韻明仲

關西門館閉芳池過盡紅塵總不知君住正當山好處  
我來剛及鴈歸時藁床穩可供殘夢草閣清宜檢舊詩

不用鵝群留坐客主人瀟洒似羲之

與諸秋官登鷄鳴寺睡起作

獨向亂山深處宿不勝空翠濕人衣幽堂習靜看僧定  
高閣懸虛見鳥飛夢裏行踪來更去醉中風景是還非  
歌聲緩逐鳴珂散又送涼颼竹外歸

登五顯廟瑞芝亭

五雲祠下衆山低三秀庭前望欲迷鬼斧鑿空通鳥道  
魯戈揮日駐雲梯青迴細澗潺湲合碧繞高城睥睨齊



三日壯遊心未倦城南風物尚能題

南會諸友餞別承恩寺席上作

挑盡文場五夜燈一身幽事屢相仍松根地僻藏孤寺  
山色年多閱幾僧却恨扁舟歸去早誤疑雙屐到來曾  
殷勤記取同遊處醉裏啣盃別未能

與何王二侍御登報恩寺塔絕頂

塞鴻飛盡渺雲濤古塔來登興正豪極目乾坤萬餘里  
俯身江海一秋毫中台地接銀河近南國山連紫氣高

年比舊遊今更壯徧梯雲路不知勞

登雨花臺

層樓望盡復高臺盡裏金陵面面開  
山色遠從城上見江流如在霧中來  
將歸漸近登高節欲賦慙非對客才  
却倚南山看北斗漢槎天上幾時迴

過朝天宮

治亭  
故址

城外諸山碧繞宮曲廊深院錯西東  
治亭人物名猶在閬水仙源路或通  
隱隱蜃樓明海日悠悠鶴氅墮天風

瑤臺貝闕三千里如在紅雲一朵中

謁將軍祠

廟中遺像儼丹青下馬來看淚欲傾  
異代興亡今又古一門忠孝死猶生  
清談不救山河圯大義終將日月爭  
獨有聖朝隆祀典年年香火石頭城

與隆平侯張公宣城伯衛公遊靈應觀

小有天高豈易攀珠宮原不隔人寰  
潭龍抱霧晴猶黑庭鶴梳風午正閒  
過嶺松聲聞漸瀝卷簾山色見孱顏

青童兩兩清如玉緩聽仙歌滿樹間

登清涼寺後臺

虎踞關高鷺嶺尊西山環繞萬家村城中一覽無餘地  
象外空傳不二門人世百年同俯仰江流終古此乾坤  
南都勝槩今如許歸與長安父老論

與翰林舊寅長遊靈谷寺

松蘿為徑石為門絕頂方知上界尊靈谷應聲來地底  
清泉流潤入雲根諸天路與雲程隔異代宮餘劫火存

賴有南都諸老在玉堂風月許重論

題魯京尹所藏雙鷹圖

霜風撼撼空林響朔氣隨空入蕭爽兩鷹意氣殊絕群  
俯視平川如一掌玄雲著樹凝不飛野日照地寒無輝  
雙身欲下不肯下似覺深山孤兔稀丹青落手翩欲活  
韝上驚看錦條脫江湖浩蕩烟水深萬里陽臺渺天末  
時維八月炎暑空兩鷹角立如爭雄周旋九紘隘八極  
此意豈在風塵中知公有才非搏擊我意亦欲辭樊籠

祇應共逐鵷鸞去去上丹山十二重

走筆題成國朱公子廷贊畫樓二絕

碧瓦雕甍面面新  
門前畫戟擁朱輪  
我公元是詩書將  
奕世風流不乏人

層樓突兀倚雲攀  
百尺闌干四面山  
好是金陵佳麗地  
應知天上與人間

留題南京貢院

院宇森嚴絕四隣  
暮堂燈火自相親  
公明合是無私地

夙夜惟存匪懈身南客不堪猶夢寐北歸何意此逡巡  
壁間擬作題名記愧有清風繼後塵

九月八日登石城泊龍江驛何王二侍御携酒

餞別聯句

龍江驛裏兩回來

璟

江上孤帆渺未開

東

我輩敢留臨

別話

舜

先生原是濟川才

珣

當筵送酒啁啾雀

璟

繞逕

尋詩雜還苔

東

攀送無能心悵快

舜

遠隨雙節到金臺

珣

是日莊孔易司副自江浦來會夜宿江上次明

仲韻

黑髮相逢是壯年別來心事轉茫然如何綠酒孤蓬話  
正在黃花九日前笑我遠同江浦雁看君清比定山泉  
江流恨不歸西北回首荒城萬樹烟

九日渡江

秋風江口聽鳴榔遠客歸心正渺茫萬古乾坤此江水  
百年風日幾重陽烟中樹色浮瓜步城上山形繞建康



直過鎮州更東下夜深燈火宿維揚

後登舟賦有序

成化庚子秋九月八日予與洗馬羅君明仲校文畢事  
歸自南都越一日重九放舟龍江風帆東下顧而樂之  
命酒相酌明仲援筆為登舟賦予輒隨韻和之甫六韻  
舟至儀真未暮也明仲乃歌以卒章予和之為後登舟賦  
振袂出郭憑虛馭舟邈沆寥之爽氣浮浩淼之長流  
感上日之芳節陳故人之佳饌眎遙川與碧樹杳秋

色兮相繆九月載臨繁霜肅止平原莽其在望芳草  
萋兮未已憂王事之靡遑卜歸期而暫喜縱鵬運于  
九程記鴻心于一紙當是時也木葉下秋虫鳴潦水落  
寒泉生路迤邐以云邁與山川而偕行將宿留以盤礴  
渺不知其為情想夫栗里遨遊龍山嘯咏曠士忘形達  
人知命慨徃古今塵編撫流光兮青鏡彼造物者之悠  
悠亦何心于動靜吾嘗南陟衡岳西經鄱陽東望滄海  
北瞻太行或違志于衆樂或後時于群芳念四美之莫

具諒茲遊之孔臧覽大塊兮茫茫瞬千里于一日快孤  
帆之高張與飛鳥兮爭速奮壯志之昂藏舉高歌以相  
屬豈必乎衡門之下能寄意于松芒乃賡載歌曰維古  
金陵佳麗地兮鍾靈孕輝寔天意兮群芳九州瑣屑計  
兮石城巉巖江洑洑兮壯哉茲遊歌以為識兮

望龍潭驛

谷口斜通驛山根半入江  
磴雲朝拂翠岩雨夜聞淙水  
靜帆來穩天空鳥去雙  
何時羈泊地幽思繞離缸

歸夢

搖落三秋地驅馳四牡歌路長心不競

闕

對

酒盃應淺教書字恐訛老親兼稚子俯仰意如何

風過邠伯高郵寶應三湖

地拆山平野烟深水抱城湖天四面濶風舸一時輕鶴  
鶴飛揚意魚龍出沒情相看總自得吾亦愛歸程

賦得白兔山送費司業廷言歸鎮江

郡入丹陽境山傳白兔名乾坤開墓地神鬼護儲精月

窟奔仍返雲根卧始驚塵埃辭穢滓星斗避光晶牛卜  
陶公兆蛇歸竇母塋茲言聞故老異代得真評吾子山  
川秀今時雨露榮賜歸省晝錦憶別向春明弔古尋刀  
約題書付管城驛亭南望久江海夜含情

淮上作

浦口烟光隔岸橫參差樓閣未分明長淮水急如貪海  
周甸山迴似抱京漂母墓前秋草綠楚王城上暮雲平  
西風忽斷高歌起坐扣船舷待月明

霧

溪霧曉冥冥秋陰覆遠汀  
離心渾易醉鄉夢苦難醒  
野漲迷新綠遙山失舊青  
起看晨旭散舟子正揚舲

桃源道中

水落洲痕在田荒墾地存  
塵沙百里眼烟火數家村  
買穀人爭市催租吏打門  
我行猶續食何用答君恩

宿遷道中

此地仍多水居人說往年  
平田翻白浪破屋帶荒烟  
黍

穀無餘種魚蝦不問錢如聞部使者又下九重天

過直河驛待明仲舟不至

直河西下直如絃水淺沙深不受船不見孤帆見雙鳥  
背人飛墮夕陽邊

隱隱青山帶落暉河流東下我西歸故人舟楫來何暮  
莫遣溪風吹客衣

邳州即事有懷都憲張公

道經下邳城城小民復貧停舟問官吏未語眉先顰季

夏月既望泗水東南奔河水出西北狂瀾互相吞蒙山  
水東注決鬻蒼崖根群流一浩渺勢欲凌高旻川流失  
故道散入農家村疊岸頽磊砢平田蕩漭淪瀾漫極千  
里連延踰兩旬居人有逋徙津吏無譏巡丁男不自保况  
復論鷄豚耆民髮半白白自謂耳不聞憶昔尚沉墊適予  
南使辰幸將一葉舟避此千丈渾歸歟歲云暮水去菑  
猶存移燈屢更僕坐為韓將軍回頭指屋宇半是波濤  
痕此事信咄咄相逢漫云云張公都臺老憂國何拳勤



移文戒州縣獻納朝丹宸願言布皇德幽谷回陽春蒼  
生正翹首慎勿埋雙輪

呂梁洪二十韻

呂梁天下奇濤石動森礪槎牙引微路鏗鞳墮深響周  
迴百里間尺地無寸壤天開與鬼鑿茲事真惚恍江淮  
實襟帶燕薊乃喉吭人云百步險此地兼倍兩冬乾苦  
焦涸夏潦愁決泝憑高瞥而下跬步不得上光陰在瞬  
息性命寄篙檣馳驅費千夫雇直糜萬鏹北人駭奔湃

欲語古已強寧甘車馬勞未倦風塵想南人慣舟楫觸  
險生技癢置身當中流舟與水爭長吾生好奇勝寓目  
堪一賞心神晝軒豁毛骨秋飈爽遠遊向湘漢舊路說  
疇曩竭從南郡來王事分鞅掌平生忠信心利涉隨所  
往高歌遡天風壯志方慨慷

見月二絕

月色四千里我行三見之此回重見月是我到家時  
野宿秋雲暝溪行曉霧寒歸心與明月夜夜到長安

夜泊徐州懷陳秋官宗器

時有文通未償因以謝之

兩岸青山水急流故人曾此鎮方州十年尚記留徐榻  
半夜虛回訪戴舟醉裏山川迷白下秋來風物憶黃樓  
莫言潦倒無文思堂上歸心正白頭

徐州洪蘇墨亭書坡老石刻後

有序

郡守蘇軾山人張天驥詩僧道潛月中遊題名  
十六字在徐州百步洪岸石石半入水水落隱  
隱見沙渚間篙師漁人不能識而崖石險絕又

非大丈夫所能暇尋閱者故于世無傳焉成化  
壬辰予過徐放舟洪下畏險岸行偶見此字嘗  
爲詩記之又八年庚子予與洗馬羅君明仲校  
文南畿歸工部主事尹廷用實理洪事邀坐蘇  
墨亭則此石已爲君所伐致置之亭壁矣因與  
明仲各賦一詩遺尹君留之亭中

我昔彭城初泊舟岸行百步觀洪流手披荒蘚看古石  
上有坡翁舊時刻沙衝水齧四百年字畫半滅丰神全

我行見此三嘆息此物乃在風塵間  
冬曹尹君真好事  
自掃巉巖鑿蒼翠山靈助喜河伯愁  
白日驪珠照平地  
孤亭素壁高巖嵒登堂見字如見翁  
山人在前僧在後  
尚憶扁舟遊月中崖端刻頌唐宋業  
水底沉碑杜預功  
直將談笑為故事似與百戰爭英雄  
高才直節古今少  
片石價比千金同由來一代不幾見  
況我異世懷高蹤  
憑君一榻數千本遍使四海揚清風

將至來溝驛道得家報八月十五日生女明仲

呼酒見賀有詩次韻

日日南鴻望北音封書聊慰別離心多情念我骨肉喜  
爛醉直教杯酒深未能賸勞湯餅客也須頻散洗兒金  
憑誰誤報中秋夜桂子青青月滿林

金溝淺

金溝溝上水如金一寸歸舟一寸心欲借天飄三尺水  
行人泥雨更愁深

沛縣懷古

小縣蕭條野水濱當時遺跡尚風塵  
山中白帝先降漢天下黔黎正苦秦  
五載衣冠朝北面三章號令憶西巡  
南畿亦是今豐沛莫作淒涼弔古人

聞潘時用復以病不終試及觀順天鄉試錄知  
蕭生鳴鳳王生佩俱落二生皆時用高第吾所  
畏愛者并紀以詩

手閱賢書次第評故人零落更無名  
生年過我今非少物論于君久未輕  
身病且教強健在愁多應為別離生

蕭郎不共王生起不盡彈冠結綬情

穀亭聞得劉時雍職方書

兩月家書一字難故人珍重達平安  
老親別後身猶健弱女生時歲未闌  
舊事匆匆那暇說長途草草若能看  
生平骨肉如君少杯酒何時共合歡

聞湖南大熟

聞道湖南熟書傳郡國遙  
桑麻隨地足亢旱隔年消  
政喜征科拙天教雨露饒  
腐儒憂國願何補聖明朝



魯橋驛送明仲之曲阜二首

聖代崇周禮儀型在孔林宮牆數仞地瞻拜百年心靈  
氣尼山會恩波泗水深獨慚奔走後無計接冠簪

又

並命辭雙闕同遊徧兩京異鄉翻送別歸路復兼程莫  
戀江山好真愁歲月并孤舟客尚可念倚門情

過金德潤秋官次李秋官若虛韻因寄陳武選  
德脩

九月孤帆下大江秋來高興正難降空傳白雪歌春調  
誰共青綾擁夜釭塵裏行驕當路滿沙頭鳴槳載船雙  
因君為謝陳兵部莫恠無詩空倒釭

得李秋官若虛署秋官元勲邵戶部文敬聯句  
見寄次韻二首

憶別秋風湖上亭故人相望若晨星河流真似九腸曲  
山色宛如雙眼青空谷有歌聞伐木異鄉何處嘆流萍  
相逢若問南行事遠道洪波次第經

千里故人持寸札旅愁無限一時消天涯歲月偏驚晚  
夢裏山川不憚遙薊北秋風歌杜杜江南夜雨聽芭蕉  
孤舟寂寞誰相問手把新詩盡日謠

夜過仲家淺閘

日維乙未月丙戌青天無雲月東出舟人喧逐夜濤發  
翻沙轉石紛出沒是時水淺舟在地牖門崔嵬晝方閉  
牖官醉睡夫走藏倉卒招呼百無計民船棄死爭赴牖  
檣倒檣摧動交碎舟人號咷乞性命十里呼聲振天地

我生兀坐驚春撞攬衣而起心傍徨同行無人僕隸散  
獨與船月相低昂攀崖陟磴不得上咫尺如在天一方  
流行坎止信有數向來蔑視淮與江霜風欺人衣袂薄  
呼童酌酒累數觴燈殘酒醒牖亦過北斗墮地天茫茫

觀趙村閘

素浪衝風雪亂花水流應似客思家歸心若與渠爭急  
祇覺歸心一倍加

濟寧夜泊懷明仲

荒城臨野泊危石繫官舡木葉驚秋思灘深攬夜眠坐  
當鳴柝後歸及授衣前寂寞同心話空彈白雪絃

濟寧舟中會沈提學仲律有作復值濮武庫用

昭遂續長句

時二君皆以  
憂歸江東

北風吹沙河水黑我舟自南君自北舟人叫鬧語不聞  
舉首推蓬兩相識君時卸帆我回舵款語留連日還夕  
世路驚聞九折坂夢魂似隔三生石長安城中舊時社  
擊節高歌氣相射君今慘澹凋朱顏一唱不和三嘆息

聚散悲歡信偶然誰能預定明朝籍與君分手各珍重  
莫遣塵埃沁顏色平生道義千黃金肯向長途暗拋擲  
兵曹濮君亦同志強把高歌慰幽寂我歌未竟君欲行  
海樹江雲杳相憶

望開河驛懷明仲

小市千家集長河兩派分野烟秋爨冷漁榜夜歌聞鷺  
宿溪邊草龍歸海上雲高城木葉下離思轉紛紛

安山驛待明仲不至留壁上

黃葉溪頭落秋風古驛亭候門無小吏留客但虛廳短  
日催行李遙天隔使星前呵夜恐到卧傍枕邊聽

聞明仲至

忽報行旌至城東一騎塵寒燈作花夜旅館欲歸人未  
覺追憶易翻疑夢寐真歸期今始定屈指到初旬

孔紳文公朝兄弟送明仲舟中却贈一首

孔門舊說多佳婿羅子名高侍從官吳地山川回使節  
魯鄉人物仰儒冠同袍義重懷三益遠道情深見二難

今日送行誰是客詩成各放酒盃乾

晚望

平川十里晚隱隱帶斜陽山色畫濃淡鳥聲歌短長濯  
纓漁父詠擊楫壯夫狂客意真殊此吾將朝帝鄉

雨泊周家店

溪雲壓船船不行兩脚墜地天冥冥川迷谷暗不知路  
獨艤孤村何處汀銅鈺無聲夜不發寒燈輝輝燄猶活  
魚蝦跳躑隨沙濤船底水聲時潑潑人言野泊愁却奪



我舟蕭然寢堪脫踞床擁被但坐睡咫尺真同卓錫地  
夢魂飢艱穩復驚急雨鳴濤轉奔沸更深夜長不得曉  
枕籍淋漓滿衣袂鷄鳴漏盡了不聞隱隱譙樓鼓聲閉  
行厨火濕寒無炊朝來盥櫥不復施披衣暫過別船去  
強以慰藉生懽娛篙工咨嗟纜夫泣牙齒戰擊肩過頤  
汝曹狼狽竟何事今我尚免寒與饑卜築休居要衝地  
生身莫作夫家兒衝寒觸熱不自保况乃困頓遭塗泥  
三升官粟僅自給萬間廣廈何能為誰當排空叫閭闔

下遣風伯驅雲師青天無言日復暮仰視列宿光離離  
七里灣

昔過南望湖乘濤下瀧口前有萬斛舟風帆霎南走蒼  
黃忽相值篙柁驚失手我舟觸回磯倨伏傷厥首兩曹  
奮交搏怒激波爭吼置身群喙中曲直勞析剖喧囂久  
乃定日入天漸黝今行七里灣百步折過久風舟杳然  
至勢復相踏蹂我舟輕似葉彼勢頗比阜艤舳半摧轢  
蕩若初未有我時當牕看兀坐但株守脫身毫釐間寄

命魚龍數他舟遠莫求揚袂屢揮肘同行無骨肉慰我  
寔良友欸我以佳話醉我以醇酒所遭信多奇內省非  
自疚明神或予相終吉乃無咎居安貴思危處世當不  
苟作詩記茲行亦足銘永久

戴家灣遇僉憲劉廷珪留飲和嚴戶部宗哲一  
絕

畫船蘭棹一時開千里歸心未易裁不為江山頻駐節  
前途只有使君來

嚴宗哲置酒臨清舟中夜話聯句

畫船銀燭照金罍珍重能勞地主來人物一時歸水鑑  
聖明四海在春臺天涯故舊還青眼白下遊從總俊才  
岐路匆匆談不盡譙樓更箭莫相催

留別嚴宗哲兼柬東潘憲副廷璽

萬家烟火靜深村野色蒼蒼曉霧昏津口月明人喚渡  
城中燈影吏開門多情不厭移衾枕餘夢猶疑戀酒樽  
更謝東巡潘豸史為予溪上駐行軒

武城懷古

野堠東連魯荒城北帶河遠山巖雨暗老樹得霜多古  
邑今如此貧民奈汝何使舟棲泊近側耳聽絃歌

舟子

柔櫓隨風送長繩掣水飛往來舟不斷行止意無違習  
久兒童慣身勞生事微篙師吾念汝應道不如歸

雨行德州道中五絕

櫓聲呶軋水悠悠卧逐溪船下穩流村曲縱淫非古調

也能驅逐客中愁

官船結屋小如堂  
野宿溪行亦自妨  
猶勝周家店前雨  
夜床狼藉滿衣裳

溪雲寂寂雨沉沉  
暝色當牕坐午陰  
九十秋光渾送客  
今朝偏感別離心

雨點隨波散復圓  
大如盃筆小如錢  
無端又逐回風起  
亂撲蓬牕半入船

南風須雨北須晴  
此語荒唐亦近情  
今日北河南下路

衝風衝雨也須行

撥悶

霧雨朝仍暗衾床晝復眠買魚來近市乞火過隣舡病  
覺休文瘦杯辭左相賢歸程却幾日真以日為年

十月一日

浦樹蒼茫合孤村路不分霧濃山潑黛風感水生紋落  
景催詩句餘寒藉酒醺京城還舊俗灑淚憶高墳

連窩驛憶亡弟東川

侍家君歸湖南  
時川寔從焉

憶昔攜吾弟同舟侍綵衣青山不改色遊子獨言歸  
夜雨堂西暗孤雲舍北飛因過舊時路為爾涕頻揮

兀兀

兀兀江湖夢飄飄隨所之胡為尚岐路聊復此襟期  
燭短詩難就舟搖字半歌長安塵土地不敢厭驅馳

裏河道中即事

十月官河道晨風與夜霜山川正搖落民物半淒涼  
隔岸人招淺汭村吏踏荒屢豐如可頌吾欲獻君王



獨坐東明仲

雨晴風亦定  
天宇淨無塵  
樹裏鴉翻月  
船頭犬吠人  
世途甘自拙  
交誼更誰親  
獨坐孤蓬底  
悠悠任此身

河燈

火裏蓮花水上開  
亂紅深綠共徘徊  
紛如列宿時時出  
宛似流觴曲水來  
色界本知空有相  
恒河休嘆劫成灰  
憑君莫話然犀事  
水底魚龍或見猜

冬日

水氣寒初重山靈曉未收  
煖烘船背日清漱枕邊流  
野泊真無事身安不外求  
書囊隨酒榼聊以代遨遊

題蕭給事文明所書扇後

故人迢遞隔關河紈扇書成奈別何  
萬里清風襟袖遠五更孤枕夢魂多  
高情敢逐涼飈棄好句還隨夜月歌  
猶恐塵埃深沆染就床時為拂輕羅

流河驛懷謝寶慶先生兼懷鳴治侍講

林下春風迥絕塵天涯舊路獨傷神  
長舡載酒官河夜

芳草懷人楚水春應學杜陵尋北郭  
兼逢小阮作南陵  
嗟予忝出黃華使猶向河邊咏伐輪

夜過靜海憶戴提學廷珍

月明滄海夜潮空又向扁舟憶戴公  
河上旌麾三日駐江南書札幾回通  
十年搃與冰霜似四海交誰骨肉同  
西望咸陽更西路有人奔走避行驄

夜泛

百里渡河路風帆自在行  
舟人寒不寐驛吏夜相迎  
對

燭頻看影逢村懶問名臥驚雲海色簫鼓動天明

直沽憶亡弟東山

楚舟回泊地嗟爾遠相迎喜極翻成泣身亡竟隔生肝  
腸吾弟盡歲月幾回更此水如歸海終當會此情

聞彭侍講數五喪已過直沽追弔不及悼之以  
詩

欲奠生芻竟不成匆匆一哭便長行誰知海內分南北  
遂向人間隔死生舊宅已更燕市主歸舡空問吉州名

從來道義交游好不盡同年榜下情

過丁字沽

十月南風不受呼須將短日赴長途僧鍾已及午時飯  
官舫纔過丁字沽新月此回真見汝故鄉何處尚遲吾  
關河百里南來鴈欲問平安有字無

與明仲晚酌

樹色烟光晻靄中亂村沙草路西東潮生野岸滄波濶  
日落高原野燒空上國程期三日近故人杯酒幾回同

官曹漫有登臨興却怪江山解惱公

舟中雜韻十首

去日星初火歸期水欲冰  
天時與人事來徃日相仍

又

岸上牛曳纜水中舟負芻  
如何先物智不及後時須

又

水淺真無力風來不自謀  
順風行逆水依舊是安流

又

陸夫困陸走水夫愁水行一般辛苦地却是兩般情

又

漁子爲夫婦孤舟即是家問渠居泊處浪起日西斜

又

民船輸官稅官清稅始平官舡載私貨邏吏不知名

又

水多長苦獲雨少又妨耕亢地偏宜濕低田却愛晴

又

陌上揮拳手田間佩犢郎時平安用此空結少年場

又

遠客憐童僕中年感弟兄江湖非浪迹骨肉乃真情

又

夜久饑腸急詩成強耐看吾詩方苦硬雖煮若能餐

蒙村

雨暗蒙村夜灘多路轉仍雁聲他浦月人語隔船燈久  
客思家甚高歌對酒能傳聞明月霽吉語且須憑



蒙村阻風憶京師諸友

溪葉蕭蕭隴樹空  
倦行還此繫孤蓬  
路窮下水復上水  
吹盡南風更北風  
歲晚江湖心尚在  
夜深閭闔夢先通  
故人多在雲霄上  
應逐鳴珂過苑東

次傅太史曰川贈行韻

使星遙望玉堂天  
不道君猶羨我仙  
近日樓臺春似海  
阻風舟楫夜如年  
因將舊事逢人說  
轉覺高情與世懸  
猶有送行詩卷在  
一時投贈許誰先

次李吉士士常贈行韻

玉堂仙侶待含香  
聞道君才欲擅場  
天上久回南望眼  
江頭初載北歸航  
高樓對酒吟秋月  
背郭看山步夕陽  
寄語通家還結社  
不勝瞻闕更思鄉

過鄣縣奉懷外舅蒙泉老先生

我公高義出人衆  
親見平生慷慨顏  
靈氣百年還赤縣  
佳城千古閟青山  
田園有業秋風老  
墓掃無人夕照閒  
執紼至今餘恨在  
使軺西望又空還

夜宿潞河驛

帝城東下接通州古郡牆高對驛樓屋角帆檣三面繞  
望中烟火萬家稠中華使者塵隨節南海倭兒布裹頭  
我去我來凡幾月他年重此記曾遊

通州道中

百二河山拱帝州十年重作西京遊太行西去連天表  
碣石東來盡海頭五服封疆終貢禹萬年玉馬盡朝周  
長安咫尺紅雲裏明日天墀拜冕旒



懷麓堂集卷九十三

欽定四庫全書薈要卷一萬六千七百二十三

集部

懷麓堂集卷九十四

明 李東陽 撰

文續稿四

北上錄

明故封太安人舒氏墓誌銘

今年秋予奉詔校文南都既撤棘聞友人沈君仲律母  
喪在殯往弔其家時仲律以按察僉事提學山西未反

也予歸過濟寧遇諸舟中與居留一夕仲律戚戚強答語殊不釋既乃言曰吾母之塋不可無銘銘非吾子固不可今日之會殆天以子假我也予不得辭因問狀仲律嗚咽後強語其概予次第其言為叙及銘母姓舒氏性聰慧識字義年三十歸贈禮部主事君某為繼室生二子鍾即仲律舉進士歷南京禮部主事鎧亦舉進士拜南京兵部主事及其先室子長山知縣鑑視愛均一封君沒二十年獨綜家政教子成業以鍾貴封太安人

年八十一卒是為成化庚子某月某日卜以某月某日  
塋于某山之原仲律言止此予不能益也獨憶仲律曩  
歲嘗迎養山西及其弟鎧官南京始奉母歸鎧卒仲律  
以母故乞歸不許乞終養又不許居嘗不樂竟以憂返  
天其弗遂孝子之心固若是哉仲律學識高雅志操修  
潔尤篤孝養觀母教者宜于子乎徵故予獨掇其大者  
著之銘曰弔母乎江之東銘母乎舟之中刻而納之山  
之宮吁嗟乎安人其永終



金陵何氏墓圖記

金陵何氏墓在南都安德門外二十里黃泥圖之原今  
百戶鎮所置以塋其祖考妣者也何之先為松江上海  
人始祖勝洪武間從軍而沒曾祖興代役以功擢留守  
後衛百戶祖費嗣官死事沙漠祖母杜年甫二十有九  
守節不二子海甫九歲亮甫七歲海以疾不任官事  
居幹內蠱亮為攝嗣者三十餘年鎮實海子名在世胄  
復承故職而杜安人固在食其祿年六十有八而終鎮

乃卜吉始兆奉祖合葬于茲而弟鑑亦祔葬焉既又命工  
繪圖以藏其家示其子若孫以識不忘庚子之歲予以  
南都試事還朝而鎮實以留府公務北上鐸舟相先後  
因述墓事請予為記意勤甚不可辭乃掇其顛末書于  
卷端使凡為何氏後者瞻視窀穸顧懷本原念其身所  
自出業所由起夙夜黽勉以圖不辱庶幾事死如生之  
義非徒宅兆簞簋為觀美之具如世俗所尚也鎮弟鑑  
鏞亮之子鋼鏐皆克家來者蓋未艾云

明故贈工部郎中楊公合墓誌銘

公楊姓諱復榮其先陝西鳳翔府鳳翔縣人考諱賢娶于李氏生公晚故名復榮李卒繼娶霍氏為故工部右侍郎瑄之姑實鞠成公公生穎慧得父書法讀書好禮力孝友圖家政誓不廢業鄉人皆曰楊公有子矣娶符氏符亦巨族咸稱內助生子恭恭生十月公喪十有三年母符亦卒比弱冠祖考妣皆先後即世塋塋子立乃依母黨于岐山岐山亦鳳翔府地遂定居為今籍恭力學

圖仕為岐山縣學生舉天順己卯鄉試登天順甲申進士拜行人司右司副贈公官及母為孺人九載遷工部郎中理畿內山東河道事復以其官贈公再贈母為宜人又六年材譽益著諸大臣薦于朝拜通政司右通政領職如故蓋楊氏自公祖考而下世皆孤傳及通政君始大顯人又曰楊公有子矣初公及宜人及公考妣之卒皆旅于符氏攢而不葬者若干年通政君念少孤弗克禮葬恒切自痛既顯乃上疏乞歸買地治兆合葬祖

考妣為一室并遷公及宜人合葬為一室祔焉先期一月予奉詔典南畿試事歸遇于河君子同年進士也乃述事畧徵予銘將刻石臨清載之西歸予方北上留弗得君遣使從予舟至天津乃畀之還公卒某塋某某月某日宜人卒于丁卯某月某日今塋地為某山以成化庚子某月日子銘以十月四日銘曰生也同堂死也異室興言孝思使我心怵誰復襁我而弗壯我九原有知寧不望我岐山之陽實隣舊疆公之孝思天徯其歲我

銘茲丘永世無忘之

懷麓堂集卷九十四